

DOMENIE II «VIE PAL AN»

Jutoris pe Liturgjie

Ai 20 di Zenâr dal 2019

I vanzei di ogni domenie a son unics e ducj impuartants ma il vanzeli di vuê al à un so puest ben precis parcè che sei il vanzelist Zuan, sei cheste messe lu ponin al inizi de vite publiche di Jesù.

Nus ven duncje presentât un fat sempliç, nuie di ecezionâl te vite dai nestrîs paîs: un maridaç,

A faserin une gnoce a Cane, e e jere la mari di Jesù e ancje Jesù, cui siei dissepui.

Nuie di straordenari, dome che une tâl fieste e diventà l'inizi dai spiêi e Jesù al pandè la sô glorie e i siei dissepui a croderin in lui.

Duncje il fat al è normâl ma il riflès al è unic: cheste gnoce e devente il spieli de aleance di Diu cun nô, di un vêr matrimoni li che Jesù, il nuviç inamorât, al met sù cjase cun noaltris che o sin la sô int.

O podaressin dî che cun chest vanzeli il Signôr al ven vuê a fâ une aleance nuviçâl come a Cane cun ogni comunitât di paîs, ancje la plui misare. Come che lui stes al proclame: là che a son dàts dongje doi o trê tal gno non, li o soi ancje jo, framiec di lôr (Mt 18, 20); se il predi al è, benon; se nol è, l'aleance e reste compagn.

Antifone di jentrade

Sal 65,4

Denant di te si plee dute la tiere
e al to non e cjante, o Altissim.

Colete

Diu onipotent e eterni,
che tu rezis tant lis robis dal cîl che chês de tiere,
scolte cun boncûr lis preieris dal to popul
e regalinus la pâs ai nestrîs dîs.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 62,1-5

Il nuviç si consolarà cu la sô nuvice.

In cheste leture o cjatin lis peraulis che il nuviç inamorât al cisiche a la nuvice tal timp de disfate dal matrimoni: peraulis di un cûr fedêl, che nol cêt e no si rassegne a la disfate.

A son lis peraulis dal Signôr a la sô Jerusalem, o miôr ai depuartâts che a tornin te lôr tiere e a cjatin la citât distrute e desolazion dulintor (agns 521-510 p.d.C.). Peraulis che a donin coragjo e sperance tun moment dramatic li che e je a riscjo ancje la fede in Diu.

A son i pinsîrs di Jesù viers la mê comunitât che lui al à sposade tun matrimoni mistic e che, furtunade o disgraciade, fedele o infedele, Lui nol molarà mai di volêi ben.

Dal libri dal profete Isaie

Par amôr di Sion no tasarai,
e par amôr di Gjerusalem no mi darai pâs,
fin che la sô justizie no crichi tant che l'albe
e la sô salvece no lusi tant che une torce.
In chê volte i forescj a viodaran la tô justizie

e ducj i rês la tô glorie,
e tu sarâs clamade cuntun non gnûf,
che la bocje dal Signôr lu disarà.
Tu sarâs une zoe sflandorose te man dal Signôr,
une corone reâl tal dret de man dal to Diu.
No ti disaran plui “Bandonade”,
parcè che ti disaran “Il gno gust al è in jê”,
e la tô tiere “Maridade”,
parcè che il Signôr al cjate gust in te,
e la tô tiere e varà un nuviç.
Propit, come un fantat al cjol une fantate,
ti maridarà chel che ti à fate sù;
e come che il nuviç si console cu la sô nuvice,
cussì il to Diu al gjoldarà di te.
Peraule di Diu.

SALM RESPONSORIÂL

dal Salm 95

Scoltade la leture, sintiments di maravee, di afiet, di ricognossince a nassin te anime nestre. O sin davanti di un amôr che nol è di chest mont e che dome un Diu fedêl al pò vê. Dut in cheste dimension umane-divine al devente gnûf crei, colm di lûs.

Il salm al interprete une vore ben ce che il nestri cûr al podarès in chest moment sintî e pandi.

R. Tu âs fatis gnovis dutis lis robis, Signôr.

Se cjantât: Il cjant dai salms responsoriâi, p. 227.

Cjantait al Signôr une cjante gnove,
cjantait al Signôr di dute la tiere.
Cjantait al Signôr, il so non onoraitlu. **R.**

Contait di une di daûr chê altre la sô salvece.
A ducj i forescj contait de sô glorie,
framieç di ducj i popui i siei spetacui. **R.**

Dait al Signôr, fameis dai popui,
dait al Signôr glorie e potence,
dait al Signôr la glorie che al so non i spiete. **R.**

Ch’e trimi denant di lui dute la tiere.
Disêt framieç dai popui: «Il Signôr al regne!».
Al ten sù il mont par no ch’al clopi,
al judiche i popui cun justizie. **R.**

SECONDE LETURE

1 Cor 12,4-11

Il stes edentic Spirt al divît a ognidun come ch’al vûl lui.

Une grande leture che e varès di sedi metude tune curnîs e poiade in bieles mostre in ogni sacrestie o sale di incuintris di pastorâl. E je culî la comunitât cristiane di san Pauli, la glesie-comunitât ideâl che o vin di imparâ a cognossi e a fâ florî.

Une diversitât di dons ... di servizis... di ativitâts... perauale di sapience... la fede... il don di vuarî... dai meracui... simpri chel stes Spirt che lis fâs... a ognidun come ch’al vûl lui... pal ben di ducj.

Il cristian in Friûl al vîf ancjemò tun stamp di monarchie clericâl. O vin di imparâ a formâ comunitâts come cheste, fate di Spirtu Sant e di responsabii. Une lungje strade si vierç par ducj nô e no manjarà la fadie par un cambiament di mentalitât ormai necessari.

Ma za vuê o sin sigûrs che se il Spirtu Sant al à dât tancj dons spirtuâi a la comunitât di Corint, al è za presint cui siei dons ancje fra di nô.

O vin di dâsi dongje tes condizions di puaretât de nestre comunitât e meti - unîts in umiltât e concuardie - la nestre buine volontât. Lui al fasarà il rest.

De prime letare di san Pauli apuestul ai Corints

Fradis, e je une diviersitât di dons, ma un Spirt sôl; e je une diviersitât di servizis, ma un Signôr sôl; e je une diviersitât di ativitâts, ma un Diu sôl, ch'al fâs dut in ducj. E ognidun al à vude la manifestazion dal Spirt pal ben di ducj: un al à vude, dal Spirt, peraule di sapience; un altri invece, midiant di chel stes Spirt, peraule di sience; un al à vude, simpri di chel Spirt, la fede; un altri il don di varâf ta chel medesim Spirt; un la virtût dai meracui; un altri il don de profezie; un altri ancjemò il diserniment dai spirts; un altri la diviersitât des lenghis; un altri ancjemò la interpretazion des lenghis. Ma dutis chestis robis al è simpri chel stes edentic Spirt che lis fâs, dividintlis a ognidun come ch'al vûl lui.

Peraule di Diu.

CJANT AL VANZELI

cf. Zn 2,9.11

R. Aleluia, aleluia.

Te gnoce di Cane
Jesù al tramudà l'aghe in vin;
lui al pandè la sô glorie
e i dissepui a croderin in lui.

R. Aleluia.

VANZELI

Zn 2,1-12

Chest inizi dai spiêi Gjesù lu fasè in Cane di Galilee.

+Fasê dut ce che us disarà: *a son lis unichis peraulis de mari di Jesù tal vanzeli di Zuan. Se anîn a Madone di Mont, o su la Mont sante, a Barbane o a Medjugorje, la Madone ni a zontarà ni a gjavarà, e disarà a nô e a lis comunitâts li che o vivin: Fasê dut ce che Lui us disarà.*

+ La mê ore no je ancjemò rivade: *ai servidôrs di Cane ur tocje spietâ l'ore stabilide di Jesù Tes Lamentazions pe distruzion di Jerusalem il piu israelit al dîs: Al è ben spietâ, tal cidin, / la salvece dal Signôr (3, 26).*

+Jemplait lis pilis di aghe: *al vûl dî che a jerin vuetis come che o podìn sedi vuetis nô. Ma Jesù al pues fâ miracui ancje cul nuie.*

+ Tu âs tignût cont il vin bon fin cumò; *o vin di servî il Signôr e crodi pazients a la sô peraule. Jesù i dîs a la pecjatorie: la tô fede ti à salvade (Lc 7, 50).*

+ *L'amôr dal nuviç, come te prime leture, nol mole; il nuviç che al è Crist nol bandonarà ni me ni la mê comunitât. E vignarà ancje par nô la zornade che Jesù al pandè la sô glorie e i siei dissepui a croderin in lui.*

Dal vanzeli seont Zuan

In chê volte, a faserin une gnoce a Cane di Galilee, e e jere ancje la mari di Jesù. A invidarin a gnocis ancje Jesù, cui siei dissepui. Vignût a mancjà il vin, la mari di Jesù i dîs: «A son restâts cence vin». I dîs Jesù: «Ce vuelistu di me, femine? La mê ore no je ancjemò rivade». Sô mari ur dîs ai servidôrs: «Fasê dut ce che us disarà». A jerin li sîs pilis di piere pes abluzions dai Judeus, ch'a tignivin fint a un etolitro l'une. Ur dîs Jesù: «Jemplait lis pilis di aghe». E lis jemplarin avuâl dal ôr. Po ur dîs: «Cumò traêt e puartait al mestri di taule». Lôr int puartarin. A pene che il mestri di taule al cerçà l'aghe diventade vin (lui nol saveve dontri ch'e vignive, ma ben lu savevin i servidôrs ch'a

vevin trate l'aghe), al clame il nuviç e i dîs: «Ducj a tirin fûr prime il vin bon e po, cuant che si è legris, chel plui scart. Tu invece tu âs tignût cont il vin bon fin cumò».

Chest inizi dai spiêi Jesù lu fasè in Cane di Galilee e al pandè la sô glorie e i siei dissepui a croderin in lui.

Dopo di chest fat, al le jù a Cafarnau: lui, so mari, i fradis e i siei dissepui, e a restarin no tancj dîs. Peraule dal Signôr.

Su lis ufiertis

Danus la gracie, Signôr,
di celebrâ chescj misteris dispès e cun fede,
parcè che ogni volte che si fâs memorie di chest sacrifici
si colme la vore de nestre redenzie.
Par Crist nestri Signôr.

Antifone a la comunion

Sal 22,5

Tu prontis denant di me une taulade
e il gno bocâl al è plen ch'al stranfe.

O ben:

1 Zn 4,16

Nô o vin ricognossût e crodût al amôr che Diu al à par nô.

Daspò de comunion

Met in nô, Signôr, il spirt dal to bonvolê,
par che, sostentâts cul unic pan dal cîl,
o sedin unîts intun unic amôr.
Par Crist nestri Signôr.

* * *

Riflession di pre Antoni Beline: **Al covente ancje il vin**

Jesù, te sô vite, and' à fats tancj di spiêi e di miracui. Tal vanzeli si int' cjate dome une cerce, uso un campionari. Ma il prin miracul, seben che nol jere propit tant impuartant e di sanscugnî, ur à fate tante di chê impression che parfin Zuan, simpri tirât tal contâ i fats dal Signôr, i à parût di no podêlu lassâ fûr. Un miracul sempliç, a preference di altris tant plui grivis...

Vanseli par un popul, an C, p. 106

* * *

Cjants

Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62 comprendût.

E ancje:

Cui mi dîs ce tantis stelis, n. 1;
Crist nus vûl bon, n. 3;
La creazione giubili, n. 5;
Lui al è la lûs vere, n. 123;
; a l'aghe de fontane, n. 135;
Quanta sete nel mio cuore, n. 136.

* * *

*Si pues vê une idee cristiane di Diu,
dal mont, des personis e de lôr redenzion,
e cun dut a chest sedi paians ducj di un toc.
Al è pussibil sedi fedêi amîs e dissepui di Jesù
professantsi ateus, materialiscj, darwiniscj.
Jesù nol è l'ideologjie cristiane,
e l'ideologjie cristiane no je Jesù.*

Karl Barth

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrîvêt a info@glesiefurlane.org*